

Mchungaji Anamjua Kila Kondoo

Usiogope, maana ... nimekuita kwa jina lako, wewe u wangu—Isaya 43:1.

Kati ya viumbe vyote kondoo ni mmojawapo wa wale walio wepesi kutishika na wasiojiweza, na katika nchi za Mashariki utunzaji wa mchungaji kwa kundi lake ulikuwa ni kazi ya daima na ambayo ilifanywa kwa bidii. Wakati wa zamani kama ilivyo sasa kulikuwa na ulinzi mdogo nje ya miji iliyozungushiwa kuta. Wanyang'anyi kutoka katika makabila yanayotangatanga ya mipakani au wanyama wakali kutoka katika maficho yao kwenye miamba walivizia ili wapate kupora kundi la kondoo. Mchungaji aliwalinda waliokuwa chini yake, akijua kwamba lilikuwa ni suala la hatari kwa maisha yake pia. Yakobo aliyeyachunga makundi ya kondoo ya Labani, katika mashamba ya malisho ya Harani, akielezea kazi yake ya kudumu, alisema: “mchana jua likanipata, na baridi usiku, usingizi ukanitoka machoni mwangu” (Mwanzo 31:40). Kijana Daudi alipokuwa akilinda kondoo wa baba yake, kwa kutumia mikono yake, alikabiliana na simba na dubu, na akamwokoa kondoo aliyeporwa kutoka katika meno yao.

Kadiri ambavyo mchungaji anaongoza kundi lake kwenye milima ya mawe, kupita kwenye msitu na mabonde, kwenye majani pembeni ya mto; kadiri anavyowalinda juu milimani usiku kucha wa upweke, akiwalinda dhidi ya wanyang'anyi, akiwahudumia kwa upendo wagonjwa na walio dhaifu, maisha yake yanaunganika na ya kwao. Uhusiano imara na wa upendo humuunganisha na vitu anavyovilinda. Haidhuru kundi ni kubwa kiasi gani, mchungaji anamjua kila kondoo. Kila kondoo alikuwa na jina lake, naye alimwitikia Mchungaji anapoliita jina lake.

Kama ambavyo mchungaji wa kidunia anawajua kondoo wake, ndivyo na Mchungaji wa mbinguni anavyowajua kondoo Wake waliotawanyika ulimwenguni. “Na ninyi, kondoo zangu, kondoo za malisho yangu, ni wanadamu, na mimi ni Mungu wenu, asema Bwana MUNGU.” Yesu alisema, “Nimekuita kwa jina lako, wewe u wangu” “Tazama, nimekuchora katika vitanga vya mikono yangu.” (Ezekieli 34:31; Isaya 43:1; 49:16).

Yesu anatujua kila mtu mmoja mmoja, naye anaguswa na hisi yetu ya udhaifu. Anatujua sote kwa majina. Anafahamu nyumba ile hasa tunayoishi ndani yake, na jina la kila anayekaa humo. Mara kadhaa amewaagiza watumishi Wake kwenda katika nyumba fulani katika mji fulani ili kumtafuta mmojawapo wa kondoo Wake.

Kila mtu anajulikana kikamilifu kwa Yesu kana kwamba ndiye peke yake aliyefiwa na Mwokozi. Majonzi ya kila mtu hugusa moyo Wake. Kilio cha kuomba msaada kinalifikia sikio Lake. Alikuwa kuwavuta watu wote kwake. Anawaambia, “Nifuate,” na Roho wake anasukuma mioyo yao ili kuwavuta waje kwake. Wengi wanakataa kuvutwa. Yesu anawajua wao ni akina nani. Anajua mtu anayesikia wito wake kwa furaha, na yuko tayari kuja chini ya ulinzi wake wa kichungaji. Yeye husema: “Kondoo wangu waisikia sauti yangu; nami nawajua, nao wanifuata.” Anamjali kila mmoja kana kwamba hayupo mwingine katika uso wa dunia (Tumaini, seh. ya 2, uk. 92, 93).